

**PEMBERITAHUAN PERTANYAAN DEWAN RAKYAT**

**PERTANYAAN : LISAN**

**DARIPADA : YB. DATO' IR. HAJI NAWAWI BIN AHMAD  
[ LANGKAWI ]**

**TARIKH : 23 MEI 2016**

**SOALAN :**

**YB. Dato' Ir. Haji Nawawi bin Ahmad [ Langkawi ] minta MENTERI PELANCONGAN DAN KEBUDAYAAN menyatakan apakah ada perancangan Kerajaan bagi mewujudkan satu lagi acara antarabangsa contohnya seperti pameran LIMA di Langkawi agar lebih ramai lagi pelancong akan mengunjungi Langkawi.**

**JAWAPAN : DATO' SERI MOHAMED NAZRI BIN ABDUL AZIZ**

**MENTERI PELANCONGAN DAN KEBUDAYAAN**

Tuan Yang di-Pertua,

Kementerian Pelancongan dan Kebudayaan sentiasa mengalakkan penganjuran acara antarabangsa di Pulau Langkawi bagi menarik kehadiran pelancong dan pada masa yang sama dapat memperkenalkan Pulau Langkawi kepada para peserta yang terlibat di dalam sesuatu acara. Bagi meneruskan kejayaan penganjuran pameran LIMA yang telah terbukti berjaya menarik kehadiran pelancong ke Pulau Langkawi, kementerian ini melalui *Malaysia Major Events* telah berjaya membida dan menyokong penganjuran beberapa acara bertaraf antarabangsa untuk dianjurkan di Pulau Langkawi. Pada tahun 2015 sempena kempen *Malaysia Year of Festivals 2015*, beberapa acara bertaraf antarabangsa yang telah dianjurkan di Pulau Langkawi adalah seperti berikut:

i. ***XTERRA 2015***

Kejohanan XTERRA 2015 adalah merupakan kejohanan *off-road triathlon* yang telah dianjurkan di Pulau Langkawi pada 1 sehingga 3 Mei 2015. Kejohanan ini telah berjaya menarik kehadiran seramai 1,043 orang peserta triathlon dari dalam dan luar negara;

ii. ***Paintball World Cup Asia 2015***

*Kejohanan Paintball World Cup Asia 2015* ini telah berlangsung pada 29 Oktober hingga 1 November 2015 dan telah berjaya menarik kehadiran seramai 2,526 peserta dari dalam dan luar negara;

iii. ***Ironman Langkawi 2015***

*Kejohanan Ironman Langkawi 2015* ini telah berlangsung pada 14 November 2015 dan telah berjaya menarik kehadiran seramai 885 orang peserta triathlon dari seluruh dunia;

**iv. FISE World Series 2015**

*Festival International Sport Extreme (FISE) World Series 2015* adalah merupakan kejohanan sukan ekstrem terbesar di Eropah yang berasal dari Montpellier, Perancis. Kejohanan ini telah berjaya dianjurkan pada 18 sehingga 20 Disember 2015 di Dataran Lang, Langkawi dan telah menarik kehadiran seramai 3,920 pemain sukan ekstrem dari dalam dan luar negara.

Tuan Yang di-Pertua,

Bagi tahun 2016, Kejohanan Ironman Langkawi 2016 sekali lagi akan dianjurkan di Pulau Langkawi pada 27 September 2016 dan dianggarkan seramai 8,000 orang peserta triathlon dari dalam dan luar negara akan menyertai kejohanan ini. Di samping itu juga, kementerian ini melalui *Malaysia Major Events* sedang giat berunding dan membida acara-acara bertaraf antarabangsa yang berkualiti untuk dianjurkan pada masa akan datang di negara ini.

Dalam usaha untuk mempromosikan Pulau Langkawi sebagai destinasi pilihan bagi penganjuran acara bertaraf antarabangsa, Lembaga Pembangunan Langkawi (LADA) juga perlu menerajui perkara ini dan membuat kerjasama dengan semua agensi kerajaan dan swasta yang berkaitan bagi memastikan usaha ini dapat mencapai matlamat yang disasarkan.

Sekian, terima kasih.